

“DI SEBALIK SEKOLAH-SEKOLAH ASING

TERSEMBUNYI PENJAJAHAN DAN KERUNTUHAN”

“Rencana ini disusun oleh segolongan besar ahli pengetahuan Iraq untuk disampaikan kepada seluruh kaum bapa kaum Muslimin. Di antara mereka itu ialah Najmuddin al-Waiz, Amjad al-Zahawi, Abdul Qahar al-Khatib, Muhammad al-Qazalji, Abdul Aziz al-Thawaf, Kamal al-Tā’ī, Nuri al-Malā Huwish, Abdullah al-Shikhlī dan, Muhammad Mahmud al-Sāuf. Saya Melayukan rencana ini supaya dapat dibaca oleh kaum Muslimin amnya dan khasnya ditujukan kepada kaum bapa yang telah menyerahkan anak-anak mereka ke sekolah-sekolah asing, diajar dan dididik oleh bangsa asing yang bererti menyerahkan jiwa dan roh anak-anak mereka di tangan musuh supaya mereka kuliti habis-habis segala yang merupakan keimanan dan keislaman lalu ditukar dan diganti dengan didikan yang merupakan, faham-faham yang beracun dan pelajaran yang menyesatkan, iaitu didikan yang mereka anggap sebagai suatu kemajuan yang paling baik. Kepada ibu bapa yang anak-anak mereka sedang diasuh dalam sekolah-sekolah asing yang tersebut, rencana ini meminta sepenuh-penuh perhatian dengan berpandukan rasa keinsafan dan kesedaran, sebelum datang masa penyesalan.”

Demikian kata penterjemahnya al-Ustaz Ahmad Sanhājī Singapura – P. Q.

(Di-Melayukan dari “*al-Jāmi‘ah al-Islamiyyah*” oleh Ahmad Ṣanhājī)

Kita sedia maklum bahawa anak-anak kita adalah amanah

Tuhan yang dibebankan ke atas tengkuk kita. Tuhan telah mengurniakan mereka itu kepada kita supaya dapat kita saksikan apakah yang mereka buat.

Adakah kita didik untuk mentaati Tuhan dan mencintai-Nya, untuk menjadikan mereka mulia dengan berbudi pekerti Islam yang tinggi? Atau hanya membiarkan mereka begitu sahaja? Atau didikan mereka itu dengan cara menyerahkan mereka ke tangan orang-orang yang akan menelanjangi jiwa mereka dari roh keimanan dan memumpakan ke dalam semangat mereka racun penyesatan dan keruntuhan akhlak dan budi pekerti dengan

tidak kita sedari?

Tuhan yang Maha Suci telah menyatakan sebagaimana firmannya: *Yā ayyuha al-ladhīnā amanū lā takhūnū Allah wa al-Rasul wā takhūnū amānātikum wa antum ta‘lamun, wa ‘lamū annamā amwalukum wa aulādukum fitnah* - (wahai orang-orang yang beriman jangan kamu khianati Allah dan Rasul dan mengkhianati amanah-amanah (tanggungan kamu) sedang kamu tahu (sedang), dan ketahuilah hiasnya harta kamu dan anak-anak kamu adalah suatu fitnah).

Dimaksudkan dengan fitnah disini ialah ujian atau cubaan. Kerana anak-anak kita berasal dari kita dan untuk kita, jika terdidik mereka dengan didikan

yang baik dan pembawaan mereka terpandang tinggi dan mulia maka kebaikan mereka adalah menjadi kebaikan kita (orang tuanya), dan kebajikan mereka juga menjadi kebajikan kita, sedang kita pula akan dapat hidup berbahagia bersama mereka.

Kebaikan itu akan membawa sebaliknya pula, jika si anak perangai dan agamanya terlucut, lepas bebas tak ada ikutan agama yang memaut, akan terlucut pula urusan mengendalikan, dan bahayanya datang muncurah-curah mengenai kita, sedang ia akan lari dari ketaatan, ketika itu bencananya akan kita derita – itu baru di dunia – sedang di akhirat kelak sebagai yang Tuhan nyatakan (*wa li 'adhābi al-Akhirati ashaddu wa ankā*) dan sememangnya seksa akhirat lebih dahsyat dan lebih pembalasannya.

Ketahuilah bahawa Allah *Tabāraka wa ta 'älā* sebaik-baik sahaja ia letakkan amanah itu ditengkuk kita lalu mewasiatkan agar kita memeliharanya dan melindungkannya dari api neraka, dan tak ada lain jalan untuk mengelakkan api neraka kecuali dengan menyingkirkannya dari perkara-perkara dan perbuatan-perbuatan yang boleh membawanya ke dalam api neraka. Wasiat tuhan itu berbunyi demikian:

Yā ayyuha al-ladhīna āmanū qū anfusakum wa ahlīkum naran wa qūduhā al-Nasu wa al-Hijārah. (Wahai mereka-mereka yang beriman peliharalah diri-dirimu dan ahli-ahli kamu daripada api neraka (yang) baranya (unggunan) manusia dan batu).

Anak-anak kita ialah golongan ahli-ahli kita malaah mereka itulah pati dan terasnnya. Tuhan telah memerintahkan agar menjaga dan memelihara mereka sebagaimana kita menjaga dan memelihara diri kita sendiri daripada membuat perkara-perkara yang boleh menyeret kita ke dalam neraka. Sebesar-besarnya perkara yang boleh menyebabkan demikian, ialah adanya jarak yang jauh antara anak-anak kita itu dengan agama mereka dan tidak mematuhi ajaran-ajaran dan perintah-perintah-Nya.

Punca kemuliaan dan sumber kekuatan dalaam mendidik anak-anak lelaki maupun perempuan, ialah agama. Jika teguh seorang itu memegang agamanya sebagai teguhnya memegang simpulan tali yang erat tak akan terurai-urai dapatlah hal-hal itu dijadikan perisai yang kebal untuk penangkis segala dosa dan bencana. Tetapi bila agama ditinggalkannya ataupun telah dicuaikannya, tak berguna lagi baginya ilmu, tak menjelaskannya segala undang-undang, selagi pengawal batinnya telah lenyap, bertukar coraknya menjadi binatang yang buas, melakukan segala sesuatu mengikut kehendak nafsu kebinatangannya, sudah tidak ada baginya undang-undang, tidak pula ada baginya kawalan.

Adapun agama dan akhlak (budi pekerti) keduanya asas kekuatan sesuatu umat. Umat itu akan dapat hidup merdeka, mulia dan bahagia, selagi masih hidup kedua atas tadi dengan kuatnya.

Musuh-musuh Islam sebenarnya telah dapat menyingkapkan rahsia ini. Mereka beramai-ramai telah berpaktat mencari helah dan tipu daya dengan mengadakan rancangan-rancangan yang diaturnya untuk memerangi kita di segi ini setelah gagal percubaan mereka memerangi kita dengan pedang beratus tahun.

Setiap mereka nyalakan api peperangan setiap itu pula Allah padamkan, malah dengan takdirnya dibangunkannya dari sebuah ke sebuah kerajaan Islam di luar kemahuan mereka. Sekarang mereka cuba menukar cara peperangan mereka dengan jalan lain. Mereka adakan rancangan-rancangan yang boleh menjamin nasib mereka agar mereka dapat hidup kekal, sedang kita akan lenyap. Mereka akan berbahagia, kita akan celaka. Mereka tetap merdeka, kita tetap berjajah – hingga *Abad al-abdain* selagi kita tetap melaksanakan keputusan yang mereka rancangkan sesuai dengan garisan-garisan yang mereka gambarkan – didorongnya pula kita agar dapat melaluinya oleh kakitangan

mereka sebagai ejen-ejen yang terdiri dari anak bangsa kita, dan antaranya mereka itu adalah bekas murid-murid mereka yang telah belajar di sekolah-sekolah mereka sebagai hasil buah tangan mereka yang mana ini semua akan lebih besar lagi bahayanya kepada kita.

Sesungguhnya musuh-musuh kita hari ini telah memerangi kita dengan berselindungan atas nama ilmu dan falsafah, atas nama adab kesopanan dan kesetiaan, atas nama kemerdekaan berfikir dan beragama konon, dalam pada itu mereka tidak alpa daripada merancangkan cara-cara menyerang agar terpaling kita dari Iman dan Islam, terlucut kita dari budi pekerti dan adat resam. Mereka cuba memasuki kita dari segenap pintu dan di antara pintu-pintu yang sangat besar bahaya dan bencana ialah sekolah-sekolah dan kolej-kolej yang mereka dirikan, mereka sebarkan penanamannya di sana sini di alam Islami. Mereka kerahkan tentera mereka untuk mengajar dan mendidik di sekolah-sekolah dan kolej-kolej tersebut. Mereka menaburkan benih-benih yang beracun untuk ditanam di setiap hati sanubari anak-anak kecil kita yang masih suci dan bersih, dan di setiap jiwa pemuda-pemuda kita mereka lucuti keimanan dan akhlaknya, mereka bentuk kesemuanya ke arah lepas bebas dan kerosakan.

Wahai kaum bapa! Sekolah-sekolah dan kolej-kolej dari bangsa asing yang seperti tidaklah dibuka kerana kepentingan kita dengan harapan dapat memberikan pendidikan kepada kita sebagai yang mereka akukan, malahan dengan adanya sekolah-sekolah dan kolej-kolej yang seperti itu menambahkan kuatnya penjajah bertapak di tanah air kita dan melumpuhkan pertahanan akhlak dan agama anak-anak muda kita sehingga dapat mereka jadikan sebagai ternak yang tidak dapat lagi memikirkan kecuali keperluan isi perut dan syahwatnya iaitu keperluan yang sangat rendah kerana melalaikan daripada dapat

memikirkan akan perkara yang lebih besar lagi mulia dan menahan daripada dapat meningkat ke darjah kesempurnaan di samping mereka tanamkan semangat cintakan musuh-musuh kita, cintakan musuh-musuh tanah air kita, cintakan musuh-musuh agama kita iaitu penyeru-penyeru agama asing

Adakah terupa pada akal kita seorang manusia yang telah memerangi dan telah membenci akan seseorang yang lain mahu ianya mengajar dan mendidik? Ke arah inilah ditujukan oleh musuh kita menyebarkan sekolah-sekolah tersebut dan berbelanja ratusan milion dolar kerana mengongkosinya.

Di bawah ini dipeturunkan sebahagian ucapan yang dibuat oleh “Zumer” dalam muktamar penyeru-penyeru agama Kristian di Baitul Maqdis. Mengenai rancangan pelajaran untuk negeri-negeri Islam dalam masa penjajahan Inggeris di sana “Zumer” telah berucap antaranya demikian: “Wahai pahlawan-pahlawan,....tuan-tuan telah dapat menuaikan kewajipan tuan-tuan, yang ditugaskan dengan sebaik-baiknya, dan dapat tuan-tuan jayakan dengan sepenuhnya. Meskipun nampaknya pada saya dengan dapatnya tuan-tuan menyempurnakannya dalam segala jurusan masih ada terdapat di antara tuan-tuan yang belum mengetahui tujuan sebenar pada asasnya. Saya akui bahawa orang-orang Islam yang telah dapat dimasukkan dalam kumpulan orang Kristian bukanlah sebenar-benar orang Islam....”. Kemudian sambungannya”.... tetapi usaha penyebaran yang tuan-tuan ditugaskan padanya oleh kerajaan Kristian berkhidmat di negeri-negeri Islam bukanlah untuk mengkristiankan orang-orang Islam, kerana yang demikian sama ertinya dengan memberi mereka hidayah (pertunjuk) dan yang demikian itu satu kemuliaan bagi mereka, malahan tugas tuan-tuan yang sebenarnya ialah mengeluarkan orang-orang Islam dari agama mereka agar mereka menjadi makhluk yang tak ada lagi

hubungannya dengan Tuhan, dan seterusnya tak ada hubungannya dengan akhlak yang menjadi pegangan hidup setiap umat.

“Sekiranya dapat tuan-tuan laksanakan tugas ini, maka ini adalah satu tanda bahawa cahaya penjajahan telah mulai bersinar, alam Islam dalam tempoh seratus tahun yang lampau..... kita telah berjaya melaksanakan tugas kita mengikut yang kita rancangkan semenjak seperti kurun yang kesembilan belas hingga hari ini. Semua itu adalah jasa tuan-tuan yang telah dapat menyediakan tipu daya yang mudah diterima oleh akal dan fikiran orang-orang Islam sehingga redha mereka itu melalui jalan yang telah tuan-tuan sediakan.

“.....Tuan-tuan telah dapat menjadikan suasana (negeri-negeri Islam) orang-orang yang tidak lagi dapat mengenal tuhan, bahkan tidak mengambil tahu untuk mengenalnya. Tuan-tuan telah dapat memurtadkan orang-orang Islam dan tidak pula mengkristiankan mereka, dan seterusnya – suasana di negara Islam menepati dengan rancangan penjajahan, tak mahu mengambil berat tentang urusan yang besar-besarnya hendakkan rehat dan bermalas-malas, tak ada yang di pentingkan mereka kecuali syahwat, kalau belajar pun untuk syahwat, kalau menompok harta pun untuk syahwat dan kalau disediakan pangkat yang tinggi sekalipun dicari juganya jalan untuk keperluan syahwat”.

Sekian ringkasan ucapan “Zumer” ahli penyebar agama Kristian yang terbilang. Dan dengannya selesai muktamar penyebar-penyebar agama Kristian yang telah diadakan di Bait al-Maqdis dengan mengambil keputusan iaitu membaharui ikrar mereka untuk melanjutkan penyebaran mereka secara lama yang nyata kejayaannya itu disamping menambah beberapa rancangan baharu, di antara yang penting ialah menambah bilangan sekolah-sekolah dan kolej-kolej serta membanyakannya di beberapa tempat, mulai dari taman kanak-kanak

kindegaten hingga meningkat ke sekolah pertengahan dan universiti dengan membekali pasukan penyebar-penyebar dan kakitangan bekas murid-murid mereka.

Wahai kaum bapa! Jelaslah sudah kepada kita apa dianya rahsia yang tersembunyi di sebalik sekolah-sekolah bangsa asing itu setelah kita ikuti ucapan “Zumer” yang berterus-terang itu, bukankah telah berbukti dan menjadi kenyataan kerap kita mencerca pemuda-pemuda kerana keasingannya?

Bukankah apa yang disifatkan oleh Zumer itu benar-benar telah berlaku?

Apa lagi yang kita kehendaki selain hak (kebenaran) tentulah kesesatan. Adakah patut kita biarkan anak-anak kita bersekolah di sana dididik fikirannya dan dibentuk kepercayaannya oleh musuh kita kaum penjajah dan pembinasanya?

Demi rencana ini disusun untuk pengetahuan tuan-tuan maka para cerdik pandai dari golongan ahli-ahli pengetahuan Iraq memberikan petua mereka sebagai berikut:

“Iaitu haram hukumnya memasukkan anak-anak orang Islam ke sekolah-sekolah penyebar agama asing *Missionary* sama ada yang didirikan oleh Inggeris, Amerika mahupun Perancis atau lainnya daripada sekolah-sekolah penyebar agama-agama asing kerana demikian dapat menjadikan kufur. Membenarkan (redha) dengan kekufuran anak membawa kekufuran orang tua, kerana redha kepada kufur hukumnya kufur.”

Dengan adanya petua ini kami menyeru tuan-tuan, menyeru hati tuan-tuan yang beriman, kami menyeru atas nama Allah, atas nama Islam, atas nama Iman, dapat kiranya tuan-tuan menghindarkan anak tuan-tuan dari sekolah-sekolah yang seperti ini dan mengeluarkan mereka daripadanya secepat mungkin, janganlah terpedaya oleh *certificate-certificate* mereka, oleh bahasa-bahasa mereka walau berapa tinggi sekalipun.

Certificate mereka tak akan ada gunanya bila bencana dan kufur telah mengenai anak-anak kita. Apakah harganya *certificate* bila orangnya telah ingkar dan khianat kemuliaannya, agamanya, tawarikh negerinya dan kaum bangsanya, derhaka kepada orang tuanya, bergembira dan bermegah-megah dengan kekufurannya dan kesesatannya.

Harapan kami agar tuan-tuan sahutlah seruan kami ini iaitu seruan yang ikhlas yang wajib kami sampaikan kepada tuan-tuan, agar terlepas kami dari pertanyaan Allah bila kami berada di hadapannya kelak bahawa kami telah menerangkan dan menjelaskan akan hukum Islam mengenai sekolah sesat seperti ini.


Di bawah ini kami peringatkan firman Tuhan untuk diperhatikan dan dipertimbangkan dengan dibaca hati tuan-tuan :

“*Man kafara billāhi min bādi īmanihi illā man ukrihi wa qalbuhi muṭmainnu bilīmāni wa lakin man sharaḥa bi al-kufri ṣadran fa ʻalayhim ghaḍabun mina Allāhi wa lahum adhābiun ʻazim dhālikā bi annahumu istahabbū al-hayata al-dunyā ʻalā al-akhirati wa anna allāha lā yahdī al-qāuma al-kafirīn.*” (surah *al-Nahl* 106 dan 107).

“Barang siapa yang kufur (ingkar) akan Allah sesudah ia beriman kecuali orang yang dipaksa sedang hatinya masih beriman, tetapi orang yang terbuka dadanya (hatinya) kepada kufur maka atas mereka itu kemurkaan Allah dan bagi mereka seksa yang besar. Yang demikian (kufur sesudah beriman) disebabkan mereka mengutamakan kehidupan dunia (kemewahan dan kesenangannya) daripada akhirat, dan sesungguhnya Allah tidak akan memberi hidayah kepada kaum yang kufur “.

Ayat ini bersambung hingga ayat yang ke 112 yang berbunyi: “*wa ḏaraba allāhu mathalan qaryatan kānat āminatan muṭmainnatan ya ṭīḥā rizquhā raghadan min kulli makānin fa kafarat bi an ʻumi allāhi fa adhaqahā allāhu li bāsa al-jū i wa al-khaufi bimā kānū yaṣna ʻin*”.

“Allah telah memberi misalan (berkenaan) sebuah negeri yang penduduknya aman tenteram didatangi rezeki yang mewah dari segenap tempat, maka mereka itupun kufur (ingkar) akan nikmat-nikmat Allah, maka Allah merasakan (menimpakan) mereka dengan kebuluran dan ketakutan dengan apa yang mereka telah lakukan”.



Pada 22 Jun yang lalu, bertempat di Balai Kota, telah dilangsungkan upacara perayaan hari zahirnya kota “Jakarta Raya” yang ke 429. Gambar menunjukkan Wali Kota, Tuan Sudiro sedang berucap dalam majlis itu.